

Kantonalni sud donio odluku



Akcija hapšenja

OSUMNJIČENIMA PRITVOR OD 30 DANA

Lica lišena slobode u akcijama Tango i Coral terete se za krivična djela: porezna utaja, teška krađa, navođenje na prostituciju...

Kantonalni sud u Sarajevu jučer je prihvatio prijedlog Tužilaštva KS-a da se za 12 osumnjičenih, koji su uhapšeni 8. oktobra u policijskim akcijama SIPA, odredi pritvor u trajanju od 30 dana. Oni će biti smješteni u pritvorskoj jedinici Centralnog zatvora Sarajevo.

Jučer, u jutarnjim satima, nastavljeno je ročište za određivanje pritvora za osumnjičene: Alen Čengić, Adnan Hadžibajrić, Mehmed Puškić i Jasmin Kulenović koji su 8. oktobra uhapšeni u policijskim akcijama SIPA. Njima, a i sljedećim licima, također uhapšenima u akcijama Coral i Tango: Vahid Alić, Sabina Bajraktarević, Emir Smalbegović, Adis Skorupan, Senadin Didik, Kemal Elkaz, Anida Kunić i Emir Ljuca, Tužilaštvo KS-a je predložilo pritvor.

100 do 200 KM po satu

Oni se sumnjice da su počinili krivična djela porezna utaja, sprečavanje službenog lica u vršenju dužnosti, teška krađa, oštećenje tuđe stvari, ugrožavanje sigurnosti, te navođenje na prostituciju kao uposlenici privrednog društva Holiday Resort.



Alagić jučer ispred Suda

Sudija Jasenko Ružić u petak, u večernjim satima, zakazao je ročište za određivanje pritvora za sve osumnjičene, međutim, advokat Damir Alagić, koji brani Čengića i Kulenovića, predložio je Sudu da se ročište za

njegove branjenike, ali i za Hadžibajrića (kojeg sada zastupa Suljo Delić) i Puškića (kojeg zastupa Nedžla Šehić), održi jučer. Prijedlog je prihvaćen.

Na ročištu za određivanje pritvora, tužiteljica Jasmina Iftić kazala je da su uhapšeni u akciji Tango odvodili djevojke do određenih destinacija, te kao njihovi svodnici, uzimali od 100 do 200 KM za sat seksualnog odnosa. Također, naglasila je da je organizator kriminalne grupe Alen Čengić, zajedno sa ostalima, napravio više od pola miliona porezne utaje. Ona je jučer ponovo pročitala prijedlog Tužilaštva za određivanje pritvora.

- Osumnjičeni se treba odrediti pritvor, jer postoji bojazan da bi na slobodi mogli uticati na svjedoke ili izmijeniti dokaze, kazala je tužiteljica.

Alagić je rekao sudiji da Tužilaštvo govori o dokazima koji se ne zasnivaju na validnoj argumentaciji.

- Ovo je ročište o određivanju pritvora. Ne možemo o tome sada, opomenuo je Ružić.

Istraga od 2006.

Branitelji osumnjičenih su istaknuli da Tužilaštvo svoje navode temelji na osnovu zapisnika o saslušanju svjedoka Mirze Hatića, koji je više puta kažnjavan zbog različitih krivičnih djela. Alagić je, također, kazao sudiji da su osumnjičeni porodični i poslovni ljudi koji nemaju nikakav kriminalni dosje. Za Puškića je kazao da je RVI te stoga je zamolio Sud da to ima u vidu jer ne može dugo boraviti u zatvorenoj prostoriji. On je još jednom podsjetio Sud da se istraga o kriminalu u hotelu Holiday Inn vodi još od 2006. i da niko ne zna kada će biti završena.

E. GODINJAK

Ostavljaš me kada mi je najteže

Pred kraj ročišta, sudiji su se obratili i osumnjičeni koje je policija sa liscama na rukama uvela u sudnicu. Alen Čengić je ponovio da je sa vlasnikom hotela Jakobom Kuessom imao validan ugovor i da je uredno izmirivao sve obaveze prema radnicima.

- Časni Sude, kao rukovodilac Holiday Resorta, mislim da sam činio etički i moralno dobru stvar. Uspio sam od hotela, koji je deset mjeseci stagnirao, čiji su radnici štrajkovali jer mjesecima nisu dobili platu, stvoriti hotel koji je za kratko vrijeme vrhunski poslovao, kazao je Čengić.

On se osvrnuo i na iskaz Mirze Hatića, kazavši da je tog momka poznao, jer je radio u kasinu.

- Kada je Hatić uhapšen, zahvalio sam mu se na saradnji. On se valjda naljutio na mene. Tada mi je rekao "Ostavljaš me kada mi je najteže", ispričao je Čengić.